

**Nunatsinni meeqqat atuarfianni ullumikkut meeqqat nalinginnaasumik atuartinneqarnissap saniatigut immikkut pisariaqartitsisut periarfissaat pillugit Naalakkersuisut nalunaarusioq-qullugit peqquneqarnissaanik siunnersuut. Nalunaarusiornermi ersersinniarneqassapput, meeqqat qanoq amerlatigisut ullumikkut immikkut atuartinneqarnissaminnik pisariaqartitsisarnersut. Qanoq ukioqassutsimikkut inissisimanersut, sumi najugaqartuunersut (kommuni sorlermi), aammalu innarluutigisaat suunersoq. Tamatuma saniatigut nalunaarusiap ersersisavaa taakkunannga qanoq meeqqat amerlatigisut angerlarsimaffiup avataani isumaginninnikkut pissutsit tunngavigalugit inissinneqarsimanersut, taakkunanngalu ilaqutariinni imaluunniit ulloq unnuarlu angerlarsimaffinni qanoq amerlatigisut inissinneqarsimanersut. Ilanngullugu nalunaarusiami ersersinniarneqassaaq ukiuni qulini aggersuni taamatut inissinneqartartut, meeqqallu atuarfiini nalinginnaasumik neqeroorutigineqartartut avataani atuarfinneqartariaqartussat, qanoq amerlatiginissaat eqqoriarneqarsinnaanersut.**  
(Inatsisartunut ilaasortaq Debora Kleist, Inuit Ataqtigiiit)

### **Akissuteqaat**

(Ilinniartitaanermut, Ilisimatusarnermullu Nunanillu Avannarlernik Suleqateqarnermut Naalakkersuisoq)

### **Siullermeerineq**

Naalakkersuisut nunatsinni meeqqat atuarfianni ullumikkut meeqqat nalinginnaasumik atuartinneqarnissap saniatigut immikkut pisariaqartitsisut periarfissaat pillugit Naalakkersuisut nalunaarusioqqullugit peqquneqarnissaanik siunnersuutit qujassutigaa

Pissutsit arlaqartut siunnersuummi ujartorneqartut erseqqissaavigineqarnissaat ullumikkut periarfissaqareerpoq, tamatumali ilutigisaanik Naalakkersuisut nassuerutigissavaat, atortussat ullumikkut suliffeqarfinni, kommunini Namminersorlutillu Oqartussani siammaassimasut aaqqissuulluarnissaat pitsaassusiisalu qularnaarnissaat annertuumik pisariaqartinneqartoq.

Taamaammatt Naalakkersuisut suliniuteqarfissaq ”Suliniutinik nalilinneq, malinnaaviginninneq uut-tuinerlu” Meeqqanut Inuusuttunullu Periusissiamut ilannguppaat, ilaatigut qularnaarumallugu naalakkersuisoqarfiit akimorlugit qarasaasiakkut paasissutissanik pilersitsinissaq, Meeqqanut Inuusuttunullu Periusissiap malitseqartinnissaanut atugassamik, tamatumanilu meeqqat inuusuttullu immikkut pisariaqartitsisut annertuumik ilaapput.

Naalakkersuisut siunertaraat pineqartoq 2012-miit salliutinneqassasoq, tassuunakkullu meeqqat inuusuttullu immikkut pisariaqartitsisut kisiisa pisariaqartutigit paasisaqarfigiinnarnagit, aammali Meeqqanut Inuusuttunullu Periusissiap tamarmiusup sunniutai malinnaavigineqarsinnaalissasut, naliliiffiqeqarlutik pitsaassutsimikkullu qularnaarneqarlutik.

Pissutsit siunnersuummi pineqartut Meeqqanut Inuusuttunullu Periusissiamut ilaareeraluartut, Naalakkersuisut Inatsisartunit immersorneqaqqinnissartik qilanaarivaat, taamaammallu siunnersuutip akuersissutigineqarnissaa inassutigalugu.